


Lo GR 70, una caminada força presada

Dire occitan | Rubrique proposée chaque dimanche avec l'Association pour le développement de l'occitan (Adoc).

Mai lo temps colina, de mai en mai de mond s'endralhan sus aquel camin. Un camin mai conegut sus lo nom de "Camin d'Estevenson" del nom d'aquel escossès Robèrt Loïs Estevenson que partiguèt del Monastier sus Gaselha lo 22 de setembre 1878 per rejonher Sant Joan del Gard (220 km e 12 jorns de caminada.). Tafurat per un amor impossible amb l'americana Fanny Osborne (que fins finala maridarà pus tard), aconselhat per son mètge per melhorar sa santat, prenguèt lo camin del Velai, tèrra de lava, amb sa lentilhas, puèi del Gavaudan amb sos bòscs salvatges trevats per la Bèstia e encara del Mont Losèra clafit de caòs de granit per s'acabar en Cevenas, país Camisard. Apassionat d'istòria voliá comprendre consi èra possible lo revèrs de l'armada del rei solelh, crentada d'Euròpa tota (10 000 òmes), facia a un còla d'escaufats uganands compausada d'un milherat de combatents que mestrejavan plan la tecnica de l'emboscada.

De mai aquel òme curiós, imaginaire, prenguèt amb el una sauma pachejada al paire Adam que sonèt Modestina. La coabitacion foguèt pus lèu laguiósa ; la bèstia èra pron capuda a çò qu'a escrich. Per que nòstre òme a contat son viatge dins un libre conegut dins lo mond entièr : "Voyage avec un âne à travers les Cévennes". Un libre consirosament cabit dins lo sac d'excursionista de cada caminaire e que lo mond esitan pas a dobrir, la caminada durant, per



■ Un émerveillement permanent sur les chemins de randonnée, avec ou sans âne.

aprofièchar de las descripcions del paisatge, d'una lusida del solelh sus la franja d'una niva, du brunsiment del vent dins la bronda dels aubres, de la relacions amb los òmes e las femnas del teraire o mai, de l'istòria d'aqueles vilatjòts enrasigats entre serres e valats ; un meravilhament permanent tot lo sant clame de la caminada que d'unes considèron coma una vertadièra caminada culturala.

"Viatjar, pas per anar endacòm, solament per lo plaser del viatge ; çò essencial es de bolegar, de sentir las necessitats e los asards de la vida, de realizar un bocin de nòstres pantalais".

E uèi l'afogament per aquela caminada culturala confortat per l'associacion

"Sur le chemin de R.L.Stevenson" a fach rebiurar las economias localas. De'n pertot sus lo camin, campatges, ostalarias, gites, logaires d'ases an espelit, totes amb una filosofia d'acuèlh ligada a l'environa, a las relacions umanas, a la literatura e a la musica.

Joves o retirats, indevidús o familhas, francimans o estrangiers se caran de descobrir d'asuèlhs novèls tant mai que l'equipament es sovent portat per los ases o los veïculs transbagatges .

Alara se l'avètz pas descobèrt, avètz encara qualques braves jorns per viure une aventura pura, mas mèfi per Sant Luc (18 d'octobre) nèu per truc, per Totants nèu per camps e per Sant Martin (11 de novembre) nèu per camin.